

Акафист святому великомученику Никите

Кондак 1

Избранный страстотерпче Христов и доблий воине Царя царей, Никито преславне, оружием Креста враги видимыя и невидимыя крепце победивый и во всеожжение тучное, яко жертву благоприятну, себе самага Господеви принесый, в песнях с любовию восхваляем тя, святаго предстателя нашего, и радостно тебе вопием: Радуйся, великомученице и чудотворче Никито.

Икос 1

Ангельски на земли пожив, победы тезоимените великомучениче Никито, ты яко ангел благий в стране Готфстей просиял еси, веру Христову людем, тьмою неверия помраченным проповедуя, темже апостолом равный деянии твоими показался еси. Мы же по долгу тя, яко проповедника Христова, ублажаем, со умилением зовуще ти сице: Радуйся, благовестниче Евангельския истины; Радуйся, языческое нечестие поправый. Радуйся, веру Христову возлюбивый; Радуйся, страну Готфскую духовно просветивый, Радуйся, диавола и слуги его обличивый; Радуйся, по имени твоему тех победоносно низложивый. Радуйся, даже до крове во исповедании Христове послуживый; Радуйся, мучения многовидная за Христа доблестно претерпевый. Радуйся, огнем всеожженный и во обители райския вознесенный; Радуйся, жертва непорочная Троице Святей явивыйся. Радуйся, столпе крепкий Святыя Церкви; Радуйся, красото и основание веры Христовы. Радуйся, великомучениче и чудотворче Никито.

Кондак 2

Видев Афанарих, лютый христиан мучитель, како святой Никита веру Христову в готфех победоносно проповедует, аки зверь дивий нань устремися и муками лютыми содробляше того тело; обаче мужества души его поколебати не возможе, зане той победитель мучителей явлься, победоносно воспеваше Христу Богу: Аллилуиа.

Икос 2

Разумев мук телесных безбедность, яко на пир, на мучения за Христа изшел еси, святе Никито, икону Пресвятыя Богородицы с собою имея, с неюже и во всех муках неразлучен пребыл еси и, тоя силою благодатно укрепляем, победоносно путь мучений прошел еси, и от Христа увенчался еси, нас же научаеши вопити тебе таковая: Радуйся, о немже возрадовашася ангели; Радуйся, емуже удивишася человецы. Радуйся, крепкаго терпения адаманте; Радуйся, совершеннаго мужества образе. Радуйся, диавола победителю;

Радуйся, всех слуг его посрамителю. Радуйся, воине Христов непобедимый; Радуйся, крест Христов во оружие победы приемый. Радуйся, тем вся враги низложивый; Радуйся, в броню веры Христовы облеченный. Радуйся, от Христовой десницы свыше увенчанный; Радуйся, ангельским ликом сопричтенный. Радуйся, великомучениче и чудотворче Никито.

Кондак 3

Сила Божия в тебе, Никито великомучениче добропобедне, славно прославися, не токмо бо мучителя Афанариха, но и самага диавола терпением твоим победил еси, и мужество души твоея явив, огнем всесожжегся, яко феникс, в вечной жизни обновился еси и во обители горния душею твоею возлетел еси, во еже со ангелы пети Богу: Аллилуиа.

Икос 3

Имеяй велию о Христе крепость, временныя муки, мучителем тебе налагаемыя, Никито премудре, ни во чтоже вменил еси и радуяся во огонь вшел еси: во огни бо, яко в цветнице, славу Божию воспел еси. Темже и мы тя славим и воспеваем гласы таковыми: Радуйся, страстотерпче Христов, в чудесех предивный; Радуйся, во огни смерть вкусивый и не опален пребывый. Радуйся, Афанариха и клеветы его сим удививый; Радуйся, вся верныя утешивый. Радуйся, всем о Господе терпящим утверждение; Радуйся, ленивым и слабодушным обличение. Радуйся, чудесы многими по смерти прославленный; Радуйся, благодать целебную от Господа приемый. Радуйся, Готфския страны славо и похвало; Радуйся, Церкви святыя радование и утешение. Радуйся, святой предстателю и молитвенниче наш ко Господу; Радуйся, обители сея святыя присный заступниче. Радуйся, воине Иисусов добропобедный; Радуйся, любимиче Его преискренний. Радуйся, великомучениче и чудотворче Никито.

Кондак 4

Буря лютых мук не потопи корабля души твоея, Никито предивне, но приводе тя к тихому блаженства вечнаго пристанищу; крестом бо Христовым вооружився, святе, прешел еси огонь мучений невредимо и достигл еси в вечный покой, идеже сладце поеши Христу Богу песнь: Аллилуиа.

Икос 4

Слышавше, дивишася христиане, како звезда лучезарная в нощи другу твоему Мариану святыя мощи твоя, мучениче Никито, показа, якоже древле волхам в Вифлееме Христа рождшагося. О сем убо

Мариан радуясь, честно тело твое, страстотерпче, в дому своем погребает, сице к тебе взывая: Радуйся, угодниче Божий, на небеси и на земли прославленный; Радуйся, венценосче добропобедный. Радуйся, сокровище исцелений многоценное; Радуйся, мироуханный райскаго прозябения цвете. Радуйся, небесных радование и земных утешение; Радуйся, болящих безмездное врачевание. Радуйся, пресветлаго мученическаго воинства доброто; Радуйся, верных некрадомое богатство. Радуйся, небесным знамением погребение честное улучивый; Радуйся, дары благодатными другу твоему воздавый. Радуйся, изобилием благ земных дом его благословивый; Радуйся, чудеса многими оный прославивый. Радуйся, великомучениче и чудотворче Никито.

Кондак 5

Боготечный источник исцелений явился в дому Мариана гроб твой честный, святе Никито, егда той в страну греческую преселился, мощи твоя святыя тамо пренесе и в храме Божиим, во имя твое созданном, оныя положи на общее поклонение верным, Богу, тя прославльшему, воспевшим: Аллилуиа.

Икос 5

Видевше чудеса преславная, Никито святе, от мощей твоих истекающая, Авксентий епископ восхоте часть их в иной град отделить; но того начинание дерзновенное абие воспятит еси и руку, мощем твоим прикоснувшуюся, омертвением поразил еси, дондеже Авксентий оный с покаянием к тебе припаде и, исцеление от тебе прияв, сице глаголаше: Радуйся, долготерпеливый Христов подражателю; Радуйся, с наказанием твоим милость и мне явивый. Радуйся, начинание дерзновенное чудесно воспятивый; Радуйся, усохшую руку абие исцеливый. Радуйся, и по смерти о Христе жив пребываяй; Радуйся, и по умертвии чудеса совершаяй. Радуйся, нетлением прославленный на земли; Радуйся, за подвиг твой венчанный на небеси. Радуйся, известный умилоствителю Царя Христа; Радуйся, за верных мощный пред Ним предстателю. Радуйся, и согрешающия вразумляй; Радуйся, и маловерныя умудряй. Радуйся, великомучениче и чудотворче Никито.

Кондак 6

Проповедуем чудеса твоя, не таим милостей твоих целебных, великомучениче Никито; от лет бо древних отцем нашим сия ведомы быша, и храмы Божии во имя твое святое в стране нашей Российстей созидахуся, идеже и лика твоего образи чудеса прославишася, и вся

верныя в вере утверждают, к небеси же сердца их восхищают, поющих Богу: Аллилуиа.

Икос 6

Возсияша чудеса многая от святых иконы чудотворца Никиты, во обители его пребывающих и вся верныя к пению мученика подвигающих; темже и мы с любовью святую память его чтим и песненно ему вопием: Радуйся, чудес источниче преизобильный; Радуйся, милости подателю предивный. Радуйся, победоносче, Богом прославленный; Радуйся, целебниче недугов душевных и телесных. Радуйся, болящих младенцев присный врачевателю; Радуйся, скорбящих и унывающих благодатный посетителю. Радуйся, силы дьявольстей крепкий посрамителю; Радуйся, на духи нечистыя власть от Господа приемый. Радуйся, действия дьявольскаго от человек прогонителю; Радуйся, от беснования лютаго страждущих свободителю. Радуйся, апостольских даров приемниче; Радуйся, ангельския кротости подражателю. Радуйся, великомучениче и чудотворче Никито.

Кондак 7

Хотящим нам славити подвиги твоя и чудеса, великомучениче преславне, помози свыше данною ти благодатию, сердца же наша от греховных помышлений очисти, да достойно и неосужденно прославим тя, о тебе воспевая Христу Богу хвалебную песнь: Аллилуиа.

Икос 7

Дивнаго победоносца и славнаго воина Христова, Никиту великоименитаго кто прославит по достоянию от земнородных; сей бо Велиара победы и вся слуги его низложи, Христа же, Царя и Бога, верно даже до смерти исповеда и от Него прославлен бысть. Темже, в храме Его святем ликующе и пред чудотворною иконою того молящися, взываем тако: Радуйся, в юдоли сей земной наше утешение; Радуйся, по Бозе и Пресвятей Богородице наш упование. Радуйся, ангельских ликов собеседниче; Радуйся, святых всех сопричастниче. Радуйся, мученическаго пресветлаго собора сияющая звезда; Радуйся, от горних высот нас грешных посещая. Радуйся, дары целебныя земнородным подавая; Радуйся, к бедствующим на помощь ускоряя. Радуйся, молящихся молитвы милостиво приемляя; Радуйся, любящим тя любовь святою воздавая. Радуйся, всещедрый и милостивый наш предстателю; Радуйся, всеблагий и скоропредстательный наш покровителю. Радуйся, великомучениче и чудотворче Никито.

Кондак 8

Странствие земное совершив и путь мучений прошед победоносно, великомучениче Никито, от дел благотворения не почил еси, но от горних высот обитель твою и люди, верно тебе молящиеся, назирая, различная нам подаеши дарования: дадеся бо тебе от Господа велия благодать недужныя врачевати, обидимыя заступати, сиротствующия младенцы окормляти. Темже благодарно тя славим и Богу, тя прославльшему, поем песнь: Аллилуиа.

Икос 8

Весь в Бозе быв, стратотерпче Христов, о Бозе чудеса многия совершил еси в жизни и по смерти и, дерзновение к Тому получив, выну молишия за люди христоименитыя и верно тя на помощь призывающим пособствуеши. Не остави убо и нас благодатною твоею помощью и заступлением, да благодарно тебе зовем: Радуйся, предивный христиан помощниче; Радуйся, преславный верующих заступниче. Радуйся, великоименитый воинов споборниче; Радуйся, вдовиц, и сирот прибежище. Радуйся, в сонних и видениях верная посещая; Радуйся, в бедах и напастех их на помощь ускоряя. Радуйся, победы тезоименитый; Радуйся, венценосче нарочитый. Радуйся, святая Церкви крепкий столпе; Радуйся, православных щите и забрало. Радуйся, царскаго скиптра утверждение; Радуйся, православнаго царства сохранение. Радуйся, великомучениче и чудотворче Никито.

Кондак 9

Вси сынове Российстии от лет древних проповедуют благодатную твою помощь во бранех, Никито предивный, яко воем православным присно на супостаты пособствуеши и молитвами твоими на иноплеменники, воюющия на нас и на веру нашу, право победы нам даруеши: сие бо во дни нашествий татарских множицею от лет древних отцы наша уведеша. Темже, ты по долгу ублажающе, поем о тебе Богу: Аллилуиа.

Икос 9

Витийство наше не довлеет прославити тя по достоянию, великомучениче Христов Никито, обаче ты, яко благий и милостивый подражатель Христов, не возгнушайся наших убогих песноглашений, но прими сия в благо, произволения сердец наших ведый, неотступен буди нам помощник, вся благая даруя нам твоими молитвами, да благоумиленно тебе зовем: Радуйся, кедре благосеннолиственный, имже покрываются мнози; Радуйся, цвете прекрасный, имже

утешаются людие. Радуйся, маслино благоплодная, елей милости нам обильно источающая; Радуйся, кипарисе сада Христова, приходящая к тебе благоухаяй. Радуйся, христолубивому воинству невидимый воеводо; Радуйся, иноверных воев страх и поражение. Радуйся, страны христианския великоименитый покровителю; Радуйся, со святителем Николаем присный ея предстателю. Радуйся, на нечестиваго Мамаю великому князю Димитрию невидимо пособствовавый; Радуйся, царю Иоанну под Казанию благодатно споборствовавший. Радуйся, соименнаго ти болярина Романова, твоего усерднаго читателя, родоначальника дома царскаго явивый; Радуйся, храм Божий, во имя твое им созданный, благоволением твоим осенивый. Радуйся, великомучениче и чудотворче Никито.

Кондак 10

Спаса Христа за люди, тя чтущия, умоли, Никито чудодейственне, и, якоже отцем нашим древле, тако и ныне нам смиренным во благая пособствовати не престай, страстотерпче Христов, победы тезоимените, но и на враги одоление у Господа народу нашему испроси, да славим тя присно и поем Царю царей победную песнь: Аллилуиа.

Икос 10

Стеною молитв твоих, великомучениче Никито, обитель твою святую выну сохраняй от всякаго зла и в ней вся живущия и подвижающия путем правым во Царствие Христово руководи, зане дадеся тебе благодать молитися о людех. Сего ради со усердием тебе поем: Радуйся, девственных ликостояний неотступный хранителю; Радуйся, дев и вдовиц, благочестию иночествующих, небесный наставниче. Радуйся, молитвами твоими, яко кокош птенцы своя, нас сохраняяй; Радуйся, яко орел крылама своима, нас покрываяй и соблюдаяй. Радуйся, старым сединам силы обновляяй; Радуйся, юным в благочестии и целомудрии утверждение. Радуйся, начальствующим во благо помощниче; Радуйся, всем ревнующим о спасении присный споспешниче. Радуйся, чудесы твоими нас утешаяй; Радуйся, враги невидимыя от нас отражаяй. Радуйся, царствующаго града священное украшение; Радуйся, небеснаго рая светлый гражданин. Радуйся, великомучениче и чудотворче Никито.

Кондак 11

Пение молебное наше, пред чудотворною иконою твоею приносимое днесь, милостиво услыши, великомучениче Христов Никито, и утробу щедрот твоих не затвори нам, выну требующим твоя благодатныя помощи, не буди, якоже и до днесь был еси, благий

наш предстатель и присный за ны ко Господу молитвенник, да о тебе радуешься и Бога славяще, поем Ему: Аллилуиа.

Икос 11

Светозарный светильник и предивный чудотворец великомученик Никита явися, той бо от лет древних отечестве наше и обитель нашу своими молитвами и щедротами не оставляет, но яко победитель, вся враги наша видимыя же и невидимыя отражает и благочестно в мире жити нас устрояет. Темже и от нас, угодниче Божий, сие благодарное славословие прими: Радуйся, великий наш предстателю; Радуйся, наших врагов невидимых победителю. Радуйся, преобладати им над нами не попускай; Радуйся, вся козни их, аки паучину, расторгаяй. Радуйся, и в час смертный любящих и чтущих тя не оставляй; Радуйся, от насилия диавольскаго их мощно сохраняяй. Радуйся, о спасении нашем Бога выну умоляяй; Радуйся, на мытарствах воздушных верным помощь твою являяй. Радуйся, и на земли недугов лютых прогонителю; Радуйся, болезней неисцелимых целителю. Радуйся, безнадежных надеждо; Радуйся, христиан похвало. Радуйся, великомучениче и чудотворче Никито.

Кондак 12

Благодать Божию видим от святых и чудотворных иконы твоя действующую, Никито великоимените, к ней бо с верою притекающие исцеления получают и здравы из храма твоего отходят, темже и мы твой священный образ благоговейно почитаем и с любовию лобызаем, и поем тобою чудодействующему Христу Богу: Аллилуиа.

Икос 12

Поюще твоя милости и многое к страждущим сострадание, великомучениче Никито, славим и величаем тя, Богом возвеличеннаго, и от любве сердечныя воспеваем ти песни таковыя: Радуйся, бедствующих скорый помощниче; Радуйся, богатящихся вразумление. Радуйся, всей России Богом данный покровителю; Радуйся, обители твоя присное радование. Радуйся, ходатаю о ней немолчный; Радуйся, молящихся врачу безмездный. Радуйся, ко исцелению единыя токмо веры требуяй; Радуйся, души и тела исцеляяй. Радуйся, верным выну помогай; Радуйся, маловерных в вере утверждаяй. Радуйся, веры отвращихся грозно наказуяй; Радуйся, страха Божия учителю. Радуйся, дерзости самочинныя обличителю; Радуйся, великомучениче и чудотворче Никито.

Кондак 13

О великий угодниче Божий, страстотерпче Христов и чудотворче Никито! Вонми молитве нашей и малаго моления сего нашего не презри, но Христа Бога умоли избавитися нам от мучений вечных, небеснаго же Царствия чрез покаяние сподобитися, да с тобою воспоем на земли живых песнь Богу: Аллилуиа.

(Этот кондак читается трижды, затем икос 1 и кондак 1)